

# Cosmographie Vniuerselle

ces Rois est le Caphri, lequel s'appelle *Zappath*, riche en mines & especeries. En icelle croist vne espece de Canne, aussi grosse en tuyau que la iambe d'un homme: dans laquelle se trouue d'une eauë, qui est plaisante à boire. En terre ferme assez auant vers le Midy; regardant de la part de Burne, y a vne belle & haulte montaigne, de laquelle sourdent des plus claires fontaines que lon scauroit trouuer, dont l'eau estant en son canal, est chaulde & bouillante à merueilles, mais si tost qu'elle s'esloigne de sa source, elle deuient tresfroide. Vous ne veistes iamais tant d'arbres portans Mirabolans, qu'il y a en ceste isle, dont ils tiennent autant, ou moins de compte, que nous ne faisons du Glan ou Cerises pardeça: toutefois que ce fruiët soit fort cher & recommandé des anciens Medecins Arabes, qui en general les nommoiet *Delegy*: autres, qui tirent vn peu sur le iaulne, *Azfar*, les Bazanez *Asuat*: & ceux que noz Medecins Latins appellent *Quebules*, ou *Chepules*, leur donnoient le nom de *Quebuloi*: lesquels noms n'ont esté cognuz de plusieurs Anciens, comme d'Avicenne & Mesua, sinon soubz le nom de *Seni*. Parquoy il se trouue de cinq sortes de Mirabolans, tous differens quasi les vns des autres. Quelques vns se sont trompez, qui ont voulu soustenir par leurs escrits, que la region Damascene foisonnoit en Mirabolans: ce que ie ne leur accorderay iamais, pour auoir veu le contraire. Je laisse icy l'opinion de Scrapion, qui dit, que le fruiët de Seni, est vne espece d'Oliue: chose dont lon scait assez le contraire. Les arbres les plus recommandez, & qui apportent les meilleurs Mirabolans, sont aux Royaumes de Maluar, Dabul, Goa, & Batecala, & ne s'en trouue en la Chine, non plus qu'és regions d'entre le fleuue Indus, & celui de Mupert. Ceux de Cambaie, Guzerat, Bisnagar, & Bengala, ne sont si bons que les susdits, & sont de ceux que lon nous apporte pardeça, qui sont plus suiets à pourriture, & à se moisir, que ne sont les autres: & les appellent ceux de ce pais là *Bumepert*, autres *Rezauale*. Les Belleriques sont vn peu plus longs que les autres, & les nomment *Gottin*, autres *Aretca*. Et quant aux obliques, qu'ils nomment *Anuale*, encores qu'ils en ayent en abondance, ce peuple n'en vte point, ains leur seruent pour nourrir leurs Chameaux. La plus part de ces arbres differēt en feuillage, les vns ne les portans non plus longues que celles de noz Poiriers, les autres moindres, & quelques autres qui approchent fort en longueur des Palmiers d'Egypte. Quant à la haulteur & grosseur, ils n'excèdent point les Amédiers de pardeça, & sont tous sauages, croissans d'eux mesmes sans estre replantez, comme sont les arbres qui portent les Noix d'Inde, desquels ie vous ay ailleurs discouru. Lesdits Mirabolans n'estans encores en leur parfaite maturité, n'ont non plus de goust, que les Oliues, lors qu'elles sont fresches cueillies des arbres: & en vsent les Indiens, non pour purger, ains pour restraindre: car s'ils se veulent purger, ils ont autre methode, & façon de faire certaine decoction du mesme fruiët: lequel quand il est confit (comme ceux de Bisnagar & Bengala) c'est la meilleure viande que lon scauroit manger, & les ont en telle estime, que nous auons les Noix confites pardeça. Au surplus, il y a des hommes qui vont de nuit parmy ceste isle, & ne scay pour quelle occasion, si ce n'est que l'esprit malin les guide, & leur apprend quelques sorceries: lesquels dés qu'ils trouuent quelcun, ne le battent ne tuent, ains luy oignent les mains d'un certain vnguent, duquel ie n'ay peu scauoir les mixtions (toutefois que ie m'en sois assez rompu la teste pour le scauoir:) & tout aussi tost que quelcun en est atteint, il tōbe malade, & meurt dans trois ou quatre iours. Le premier qui leur à appris telle maniere de cabale, ce fut vn More esclave du Roy de l'isle, nommé *Kameth*, grad Astrologue, & accort en tel art. Parmi les Caphris il y en a encor, lesquels adorent, non des Idoles, ou ce qui se presente le premier deuāt eux, mais sans auoir temple ny oratoire autre que leur maison, adorent le plus ancien disans, que ils l'estiment leur pere, & qu'ils descendent de luy, & que tout le bien qu'ils possèdent,

Cinq sortes  
de Mirabolans.

Adoration  
des Barbares.